

Istinski borac za ljudska prava

Za Salema Šehovića komotno možemo reći da je univerzalac u pravom smislu te riječi. Dobar je novinar, promotor knjiga, radio voditelj, voditelj estradnih priredbi, muzički menadžer, fotoreporter, ilustrator, antikvar,... Ne kviri starine, hehe, nego ih brižno čuva i uljepšava. Novinarstvom se bavi dvadesetak godina. Njegovi novinarski početci vezani su za ratni Radio-Konaci 1463, koji je imao sjedište u Bilalovcu. Tada smo se i upoznali, jer sam i ja na toj radiostanici uređivao i vodio neke emisije. Upoznali smo se u teška vremena, ali smo se vrlo lako sprijateljili, jer smo obojica "lahki", i naše prijateljstvo traje i danas i trajat će, ako Allah da, do Sudnjeg dana. Bio je voditelj programa na Radiju-Irib u Teheranu. Pisao je za najpoznatije bh. listove i časopise. Kao što se od njega i očekivalo, jer je majstor pisane riječi, ovih dana je pripremio rukopis za štampanje i izdavanje svoje prve knjige, pod nazivom "Narod mog vremena". Naslov je u skladu sa njegovim srcem i njegovom dušom. Šehović je u službi naroda, bori se za ljudska prava, pomaže obespravljenim, bolesnim i siromašnim osobama. Nije, kao mnogi političari, samo u svojoj službi, u službi svoje porodice, rodbine i najboljih jarana.

Na početku rukopisa, napisao je ovako: "Bogat čovjek je onaj čija se djeca zatrče u njegov zagrljaj, čak i kad su mu ruke prazne". Salem zaista voli djecu i njega djeca vole. Blago onome koga djeca vole.

Za knjigu je pripremio šezdesetak priča, koje su vrlo zanimljive. Doduše, neke priče su "slika i prilika" novinskih tekstova, ali ne "običnih" tekstova, nego onih, koji bi se, kao od šale, mogli uvrstiti u rubrike "Vjerovali ili ne" i "Nevjerovatno, ali istinito". Najviše je pisao o "malim" ljudima, dobročiniteljima, neimarima, a priče je posvetio i nekim poznatim ličnostima. Neke priče se nježno naslanjaju na pripovijetke, što pokazuje da Šehović ima pripovijedački dar, pa od njega očekujemo da napiše i zbirku pripovjedaka. Sve u svemu, ovo djelo je odlično. U njemu će čitatelji od 7 do 77 godina moći pronaći ponešto za sebe. Rukopis Salema Šehovića toplo preporučujem za štampanje, sa željom da knjiga što prije ugleda svjetlost dana, da se nađe u biblioteka širom BiH, da obraduje autora, kao i sve ljubitelje lijepe pisane riječi.

Bilalovac, decembar  
2013. godine

Džemal SOFTIĆ